

筆記小說大觀集

蜀難敘略
清沈荀蔚著

粵行紀事
清瞿昌文著

進步書局校印

平江小地八記

商賈行紀
卷下
自序
卷上

吳興
甲子

清 沈荀蔚述

蜀
難
敘
略

上海進步書局印行

蜀難敘略提要

此為婁東沈荀蔚氏撰書中紀獻忠寇蜀
及士民殉節流離始末蓋沈當崇禎之末
隨任雲陽躬罹此難顛連困躓於賊中者
閱二十餘年始克生還故能於當時情狀
言之鑿々至敘賊黨種々殘暴慘酷幾令
人有聞猿下淚談虎色變之概

蜀難叙略

清 婁東沈荀蔚述

慨自潢池肆毒。薄海同仇。凡被兵之所。遠邇俱得其詳。惟西蜀僻在一隅。聲問阻絕。隄防隙而洪水滔天。棟宇焚而烽煙匝地。豈世運之難挽。實人事之不修也。荀蔚髫齡不造。遭此慘烈。歷年以來。亂靡有定。雖升沈代謝。世所恒有。而滄桑陵谷之狀。誠有曠古僅見者。乙未丙申間。幸為巴蜀河清之會。蔚亦稍能筆墨。因於帖括之暇。或追惟往事。或蒐集遺聞。期於可信。咸筆之於書。自茲以後。凡耳目所及。日附益之。始則國破家亡。既而子身萬死。總目之曰蜀難叙略。埃難平則止。或出蜀亦止。蔚之願也。不幸戊戌正月十九日。方居母憂。而書燬於火。繼作之。至己亥二月初二日。值高承恩之難。復棄於兵。今甲辰二月十五日。歸帆東下。已達楚境。名曰新灘。又逢陽侯之怒。僅以身免。蜀難餘波。猶若是其酷也。後在襄陽署齋。永夏無事。復追憶而次序之。尚得十之五六。而西山餘孽。又適於是平。蜀難誠始終於西山矣。蔚萬里餘生。當此可勝慶忭。明年布帆無恙。得返故園。將挾是編以志終天之恨云。

崇禎十五年壬午春正月。荀蔚年五歲。隨先君子赴四川城都府華陽縣任。沂江而

上四月十六日始至。時川西新經民變。獷悍如故。先君子力為興利除害。年餘政聲始起。癸未冬。聞潼關失守。逆賊李自成據西安為巢穴。將渡河。張獻忠尤狡黠。先已屢犯蜀地。熟悉險要。出入飄忽。及蹂躪湖南。遷延不入黔粵。先君子遙度賊勢必復入川。屢請諸當事。為未雨綢繆之計。而皆苟安無事。先君子動多掣肘。惟拊膺太息而已。先是有搖黃賊震天王混天星搖天動黃龍等十三家。出沒於川東北山谷間者十餘年。殺掠人民無算。取少壯者文其面。作川王大王等字樣。以益其黨。漸至十餘萬。有秦繼勳者。川東石砭土司秦良玉之族也。與華陽奸民某等。潛伏內地。每作搖黃耳目。故賊得乘虛肆其凶。難民無不欲食其肉者。後被擒。須報決。忽來防範稍疏。與其黨數十人。夜殺獄卒遁去。諸吏請曰。昏夜倉卒。賊必不及遠去。請大索城中。庶可獲。先君子曰。不然。賊非有外援不及此。必走歸石砭矣。吾聞石砭屢著戰功。今其女官秦夫人。主事尤稱忠順。我若遣汝等將之以重幣。鼓之以忠義。則不惟渠魁授首。而東方亦可免意外之變矣。乃遣能役數人。即日東發。潛至其所。秦夫人果大喜。以大義滅親自任。將繼勳等如數擒出。斷其手足。指嚴軍解至。且附文申請案院。圖寫全蜀形勢。請益兵分守十三隘。蓋土司屢請於巡撫陳公而不獲者。今欲藉先

君之力而得之於巡按劉公也。劉公雖許可。奈無現兵。必須召募。而又乏餉。終成無米之炊。請於蜀藩。蜀藩不與。又不能專。必俟與撫議。而巡撫駐重慶。東西遼遠。文移往還。動須浹月。歲聿云莫矣。

順治元年。即崇禎十七年甲申正月。獻逆悉衆犯蜀。守將秦夫人及參將曾英趙崇貴。俱以守禦單弱。先後敗績。賊遂長驅而上。三月。成都戒嚴。先君子求見蜀王。不得。內江王知之。以先君子策內言於蜀王。王終以祖制為辭。不能用。五月。聞李逆陷燕都。而川東斷臂。難民紛紛逃入省城。一時人情洶懼。不知所為。蜀王始出財佐軍。然已無及矣。衆議蜀王監國。御史劉之渤持不可。躍入荷池。議乃寢。初巡撫陳士奇提學政。好談兵。故朝議即命撫蜀。及撫蜀。又日以詩文為事。軍政皆廢弛。故賊得成破竹之勢。屯於忠州之葫蘆壩四十餘日。復左步右騎。翼舟而上。六月。曾英守涪州水路。趙崇貴守梁山陸路。俱敗而逃。賊遂奪佛圖關。以火攻陷重慶府。大殺。次日悉斷民右手。以瑞王及關南道陳勲。瑞王本封漢中。以國破奔重慶。陳勲及巡撫陳士奇。龍右士大夫多挈家從之。至是皆不免。知府王行儉。巴縣令王錫等。縛於教場。將殺之。忽雷雨晦冥。逆向天詬曰。我殺人與天何涉。以大礮向天叢擊之。俄而晴霽。遂皆遇害。七月。逆留賊將劉廷舉守重慶。已

率衆西上。成都大震。內江王以先君子言皆驗。出私財益召募一千八百餘人。隸總兵劉佳胤標下。然皆訓練不素。而火器局復自焚。城中一無所恃。先君子自分必死。與原知太倉州事理刑劉士斗。成都縣令吳繼善。及諸僚屬。日相勉以忠義。曰。事至此。我輩之存亡視此城矣。他非所知也。時有邛州舉人劉墨仙。與成都令善。為謀遣種計。吳春乃約同舅氏張叔度。攜先母及蔚兄妹。於七月十四夜出南門。由雙流新津入臨邛城暫住。八月初五日。賊薄成都。劉總兵出戰而敗。賊遂穴城下。實以火藥。又取大木長數丈者。剗之。兩兩相合。纏以繒帛。亦貯藥。向城樓。城上望之。益懼。復勵衆擊賊。賊卻二三里。衆皆喜。以為將去也。初九日黎明。火發。而北角樓陷。木石如飛。烏蔽天者久之。守陴者皆走。賊遂入城。蜀王率宮眷投於井。劉總兵赴水死。各院司道府及諸文武官俱被執。十一日。盡驅城內軍民男女於中園。將盡屠之。俄有龍尾下垂。逆以為瑞。遂免死。仍逼入城。先君子被幽於大慈寺。逆遣其黨饋食。以厚祿相誘。更以天命為詞。先君子擊案罵曰。吾豈食賊粟哉。自兵敗時已不食。求死不死。何不速殺吾。將助國滅汝等也。賊黨知不可屈。往報逆。逆大怒。先君子遂與御史理刑兩劉公同遇害。初御史及崇慶州知州王勵精。皆與逆同里人。初疑之。至是勵精聞

省城陷。即朝服望北闕拜。坐樓上。舉火自焚。勵精嘗於壁上書文文山孔曰成仁等語。後二十餘年。壁字猶如故。及州民建祠奉公像。甫祭畢。而壁適頽。其精誠所積如此。逆初猶稱李自成永昌偽號。至是踞蜀王宮殿。僭偽位。國號大西。改元大順。以成都為西京。自為聖諭四言勒之石。設偽宰相以下各府部。內外文武官。以汪兆麟為偽相。兆麟桐城諸生。從賊已久。殘忍狡獪。知逆好殺。每先事承迎之。以固寵。又以綿州嚴錫命充偽吏部。彭縣令湖廣王國麟充偽戶部。彭縣龔完敬充偽兵部。某縣令某充偽禮部。而偽工部者王其姓。與逆同起延安弓工也。癸巳歲有滇人楊經由白鹽井提舉陞四川洪雅令原籍太倉。蔚嘗見其遣人歸滇。有稟啟自稱沐恩下吏。問之。楊曰。此余恩上王尚書者也。余非其力不及此。王與張同里。以製弓良故。西京時為大司馬。空然為人甚慇。不識文字。名某字某。爵令不憶矣。其孫可望。劉文秀。李定國。艾能奇。四人者。逆假子。皆從張姓。為將軍監軍先鋒等官。主兵柄。兆麟主機務。王尚禮。馬元利。馮雙禮。張虎等。為偽都督。又配知府以遊擊。知州以都僉。知縣以守備。皆以偽科所取文武進士舉人為之。以東門外中園作教場。南門外萬里橋為屠戮之所。省城內外通衢房屋。皆自前簷截去七八尺。兩旁取土覆道上。以利馳驅。城門出入。必有符驗。登號甘結。犯則坐死者甚衆。入城者面上猶加印記。若失之。則不得出。其後惟聽入而禁出矣。又凡衛僻閭巷有

人之所。即分發調事之賊。謂之查事人。房屋垣扉皆遍。如兩三偶語。或夜中燈火及
夫妻子女語言。間有稍涉不吉。若未平不穩。斷絕死敗之類。次日併左右隣里十家
皆斬之。死者初不知為何事也。其有不及報而為他處發覺者。則併查事人亦誅之。
其殘暴類如此。時蔚母子居邛州。十一日。邛州諸生聞省城失守。即糾集無賴。向上
南巡道胡恒伐鼓大譟。索印款賊。恒不與。時兼理建昌備兵事。挈家將南走建昌。城
中鼎沸。蔚母子亦倉皇同奔。抵雅州河畔。見衛送胡恒義邊蠻兵數十人奔回曰。胡
道家已為王知州所執。將解省。慎勿渡也。乃於就近桐子林地方暫寓。王知州者名
國臣。本秦人。久通賊。恒廉得其故。嘗齟齬之。故國臣切齒。將甘心焉。又值國臣欲併
將蔚家解賊。幸藉浙人錢州目經營得免。時有雅州生員傅原脩。密說天全土司高
躋泰。於二十四日出兵擊國臣。國臣遁入成都。躋泰遂迎恒家入其地。然州民俱散
走。蔚亦踉蹌同奔至孔家坪。數日道路之口。已紛然傳先君子與兩劉公同殉節矣。
蔚母子聞之。雖痛徹心髓。而不敢發哀成服。又勢不可與吳眷同居。遂告別。由思經
山至洪雅縣地方止戈街暫居。以地名佳也。旬餘。忽一日清晨。見西岸中保壩悉成
戈戟叢。而地下無衣死人數千。且衣朱碧者已紛紛渡河。方知賊已乘夜襲殺居民。

人皆膽裂不識何以竟無人馬聲也。賊旋下令曰：凡兩處市鎮俱順民毋恐。家給大順錢緡於首，可不死。而山中作逆者當剷除之。人以此是不敢入山。然搜求仕宦尤為殘酷。濱於死者日以數計。數日後賊赴雅州。始得轉徙八面山下。然從此山中亦不可居矣。時有詔起原大學士王應熊為督師，專辦蜀寇。應熊重慶人。駐紮江達州。兵備馬乾。擊賊將走之。復重慶府。乾雲南人。初衆議請代士奇撫蜀者。九月李自成遣賊將馬科至綿州。獻逆使孫可望與戰為所敗。自往擊之。科乃遁歸漢中。逆使李定國等追之。遂取保寧龍安二府。可望又取茂州。未幾松潘副總兵朱化龍合同知詹天顏擊斬賊將王運行。遂復龍安。又復茂州。時逆以王國臣為茶馬御史與艾能奇率賊數萬至雅州。飛仙關脅土司獻胡恒及避亂宗室朱奉鈿等數人。又取躋泰之弟登泰。詭云授以官。乃還至成都皆殺之。後乘土司無備突入始陽。土軍俱散匿。賊無所得。三日後土軍大集。賊倉卒退回。土軍蹙之於河。死者千餘人。十月逆令各郡縣起送王府宗室暨家口數萬人皆殺之。惟富順之鎮國將軍平櫟蜀王弟子也。間道走榮經縣。而建昌守將丁如龍周雙喬李鳳越舊指揮王自明等初被胡恒檄引兵亦至。知恒已被害。乃與黎州千戶馬雲龍土官馬京等率七姓蠻兵謀擊賊。劉總

兵之入援也。標下參將黎州曹勲。嘉定楊展從之。城破。俱執於南門外。將殺之。會日暮。繫解。俱投水得免。時勲逃至榮經。衆喜。遂共推為帥。於是內江原戶部主事范文英。邛州舉人劉道貞。廬山程翔鳳。生員傅原脩。洪其仁。與勲等同奉鎮國為盟主。稱蜀王。圖興復。共拜勲為副總兵。統諸將。文英為監軍道。道貞為兵部職方司。翔鳳為監紀官。勲率諸將敗賊於雅州龍鶴山。追至城下。反為所敗。遂失榮經。退守小關山。楊展之得脫也。至新津。得鎮標潰卒千餘人。遂奉為將。展令其衆由間道趨敘府。而已至嘉定。取家口來會。及歸。而嘉定與諸屬邑俱降。賊改為府。設偽官守之。展與其子璟新走敘府。未幾城陷。展遂奔盧衛。又謁應熊於遵義。應熊授以故職。旋加副總兵。十一月。逆令搜求仕宦。及起送衛所世職。皆殺之。又案籍誅其妻孥。無得免者。而僧道醫卜陰陽諸流。及百工技藝人。或託言齋醮。或考試。或興大工之類。至則皆死。而拏戮之法亦如之。又拘紳袍富室大賈。罰餉銀。皆以萬計。少亦數千。不問其力之足否。事甫畢。則又戮之如初。或有訐訟干連公事齋解之類。至則不問何事。並解役亦無歸理。又於田里起征戍之兵。而排門徵運糧人夫。乘有事漢中也。初李定國等追馬科。既取川北。至是進攻漢中。不能克。而科又與賀珍合兵來戰。定國等望見悉

棄資仗奔還。而諸兵夫並未至漢中。然竟無一歸者。時蜀地自遵義而外。皆為賊有。逆乃僭用郊見之禮。以祝文表牋。有黏接處。遂怒其偽。禮部某。全家皆死。謂不欲其一統也。旋又以不葺治衙署。殺其偽兵部龔完敬。凡內外各偽文武官。偶有小過。輒斬之。重則剝皮。實以橐而衣冠之。或剮則刀數以千百計。若大杖乃用百十之數。而笞之則亦以千計。班聯中未有不失其故步者。然又萬無逃脫之術。寧非噬臍無及乎。每有報某官闔門自盡者。於是本官衙役及查事人。與附近居民。皆坐死。

二年乙酉正月。逆以蜀民多阻險自固。益恨之。令閉諸郡邑城門。悉行斬戮。人皆惴惴待死。投繯赴井者無算。旋傳偽詔赦之。逆殘暴日甚。人知必死。凡有險阻。皆舉義旗。然亦有附名起義者。雖云殺賊。其實志在財物。如上南則惟洪雅山深。故為尤甚。動稱黎州蠻兵。蔚自去冬入山。至今春三月。被掠者三次。衣物一空。且動以居民從賊為言。而賊至則又以為叛地。後蔚匿於窰中。又為土兵所得。以語言不達。渠等反認為賊。官眷屬。帶入九溪。渡鐵鎖橋。見其主將黎神武。備述殉難之由。幸彼方以義師為名。正欲培養忠義之後。以服衆。遂安插於小尖山西縉寺。稍饋資糧度日。於時

雖有山谿之固。苟延殘喘。而孤蹤天末。愈復無聊。然亦無可如何也。時聞副總兵曾英初與川東道劉鱗長次綦江。至是入援重慶。大破賊。馬乾之復重慶也。賊將劉廷舉遁歸。請救於獻逆。逆命劉文秀統賊數萬東下。置老營於合州之多功城。三月至重慶。水陸夾攻。英乃遣部將于大海李占春張天相等分禦水陸而已。平精騎數百。從間道襲破賊營。取其旗幟。還與大海等夾擊。大破之。賊得免者僅三千餘人。英威聲大振。一時卒起之將皆歸之。至二十餘萬。且多舟楫。福王知其功。故以平寇伯加之。而楊展亦復敘府。春夏之交。賊將馮雙禮每戰輒敗。及孫可望來援。展乃敗奔江津。又聞逆發賊數萬迎戰。朱化龍蔡僉事於羊子嶺大敗。化龍乘賊行列未定。遽以三寨番騎數百衝之。賊見即驚潰。死者山谷皆滿。其得免者十纔二三。化龍以孤軍不敢窮追。乃還守舊地。蔚居山中。見黎神武等所為殘忍妄誕。凡有俘獲及挾仇相害者。但云從賊。無不手刃之。又服飾不經。或戎服以白繒纏首。或紗帽補服。文武九品互用。或取神廟金色幘頭及龍袍著之。而其下參遊都守。則尤不倫。有衣冠璀璨者。有袒裼襤褸類乞丐者。每朔望則雜沓而至。事已。則器仗之屬悉以父兄子姪及隣里輩持之。須臾已沾體塗足。同作農事矣。此間晴期甚鮮。盛夏不扇。雨夜則附火。

挾纊。秋見霰雪。時尉已八歲。覓書不得。得敗甲一領。舅氏日取其中殘編綴而課之。九月。逆詭以秋選科試之法。誘殺進士舉人貢監生員及家屬合數萬。又開特科。死者復萬七千餘人。時文廟自火。逆曰。孔聖人不喜我殺其弟子邪。兆麟曰。四川文運已絕故也。是月。神武率衆三千餘人。同黎州漢土兵將與賊將艾能奇戰於雅州。敗還。十一月。僞上南道綿州郝孟旋反正。孟旋見賊所為。欲歸明朝未得。而范文英程翔鳳知之。自小關山遣人招以書。孟旋遂襲殺守雅州賊卒。復稱明朝正朔。而以城付文英。自命其衆曰匡正營。往攻邛州不克。遂入洪雅之花溪山。後為團練參將熊振生所殺。時逆決欲盡屠蜀民。乃僞下除城盡勦之令。云凡居山野者俱叛逆。將悉行勦滅。城內者俱良民。乃免死。於是深山窮谷之人。咸扶老挈幼入城市。露處猶不能容。賊乃閉城禁出者。而悉衆入山野搜捕掩殺。嬰孩無得免者。每賊日須首級或二三。或四五。多寡以地方大小繁簡論。如式乃已。不則亦殺之。後利其輕代以手鼻。其數亦如之。死者數千萬。骨肉之山。纍纍相望。又令賊卒凡子女玉帛及一應貴重之物。不得輒留。犯者死。人畜以刀劍而諸物可焚者則以火。惟金銀必以水土沈埋之。既而城中屠殺焚燬一如前法。且墮其雉堞焉。

三年丙戌正月。賊各屯戍俱撤回。併撤其偽文武官。偽官知不免。於是相繼反正。洪雅偽守備潘璘。乘義旅臨城。亦欲降。謀於偽令嚴賡。賡不可。欲執之。璘走得免。遂啟城潛納外兵。斬賡首。赴雅州獻馘。尉於范公所見之。先是上年十一月。黎神武率衆從范公入雅州。聞公訪求故官。神武言之。公由是知尉及故義眉劉令在九溪。即撥夫馬迎至楠木坪暫居。與公眷屬密通。尉即同舅氏赴雅州請見。始知公為先君子故人。公以洪雅需令。遂檄舅氏仍以經歷職銜署縣事。留尉十餘日。慰勉備至。而屬望甚深。且以子相視。名曰世蔭。示應卹廕也。仍檄標下參將熊振生。送至乾坝場。且就近供億。而舅氏赴任。是時民已屠盡。逆惡貫亦盈。怨鬼俱出而揶揄之矣。一日。逆聞後廊下。有奏樂聲甚嘹唳。逆拔刀將殺之。見無頭女子數十人。共奏樂器。逆驚仆。久之方甦。又一日。逆獨坐飲食。空中忽下數千百手奪之。入城中每日入。即聞言語及號哭聲。就視之則無所見也。而賊卒每出夜巡。即有瓦礫叢擊之。至不敢出。逆惡其不祥。移出於中園屯之。名為御營。中有浮圖。逆命礮墮之。賊中磚石死者數千人。二月。逆夜縱騎登高遠望。見時有火光。及聞人畜聲。逆怒其衆屠之不力。誅其主者。遂遣賊守其奔逸之路。搜牢一空。無或免者。逆嘗向天詛云。人民甚多且狡。若吾力

所不及。願天大降災殃。減其種類。又每於隨身夾袋中取書冊。方二三寸許。屏人檢閱。然逆初不識文字。不知何故。賊自出屯以後。日惟焚燬城內外民居及各府署寺觀。火連月不絕。惟蜀府數殿累日不能焚。後以諸發火具充實之。乃就燼其宮牆甚堅。欲壞之。工力與砌築等。不能待而止。又獲人牛各數千。負耒耜驅之。散行田野間。遇禾稼則耕殺之。其所聚金銀。以千餘人運之江干。三月始畢。至是測江水淺處。多支流以殺其勢。一如築決河法。水涸於江底作大穴。投以金銀。而殺運夫於上。後覆以土。仍決江流復故道。後續有所得。俱剝木成鞘。運至新津江口。載以千餘艘。將為順流計。至巫峽投之。時賊久聚成都。除川西平原皆成空地。其餘皆建義旗。楊展已於春間泝流取上下南之地。屯嘉定州。與黎雅之曹勲等聯絡相應。威茂之朱化龍與龍安之詹天顏曹洪等在西北。而曾英馬乾屯重慶。譚文等屯忠州。萬縣王祥屯遵義。督師幕府在焉。此東方也。暴布星列。遙為聲援。賊勢日蹙。惟川北之保寧順慶二府尚有賊將劉進忠守之。進忠知逆無成。已率眾至忠州。欲與曾英合。已而自疑。復引還。逆欲殺之。未得。七月。逆以川北民未盡屠。且欲誘殺進忠。乃燒其財貨舟楫於新津。拔營而北。所至留數日。焚戮如川西法。赤地乃已。九月入順慶府。屠之。屢檄進忠不